

四庫全書

集部

欽定四庫全書

學餘堂詩集卷四十八

翰林院侍讀施閏章撰

七言絕

磨盤山憶兒淳在宛陵家累在洪川

客程鄉思苦漫漫積雨千山行路難知爾樓頭高處立
幾回北望又南看

值青州人便走筆寄劉止一

予歸自濟劉置祖帳
十里外携善歌者曼

聲苦調曲未及終而別又同游
龍洞有詩劉拔佩刀為予鐫壁

幾年高枕卧烟蘿愛客論詩興若何
舊日何戡無恙否
離亭半曲淚痕多

北海郵書久寂然西湖新句獨翩翩
最憐龍洞同遊處
鑿石分題又五年

宿青駝寺

亂峰躑躅暮雲平小市人傳古寺名
月白馬寒嘶夜半
不知何處有鐘聲

宿邳城聞僕夫言次日四十里外即江南界

千峰萬壑倦征驂客路歸心兩不堪忽訝燈花成一笑

郵亭明日是江南

淮上別張菊存

張有曲
江園

纒絲無盡曲江遊送我重登出浦舟淮水亦知離別意
相隨日夜向南流

讀漁洋山人集漫題

王阮亭
集名

萊陽大雅益都清各自論詩擅一城玉樹臨風今獨秀

新城不說濟南生

萊陽謂宋荔裳益都謂趙韞退濟南李于鱗也

六益過署齋得雨止宿

孤城日暮罷登臺江閣炎蒸向水開正共古人杯在手

南山夜雨過江來

天涯將老未歸身同是江湖澹蕩人今夜對眠深剪燭
何年散髮共垂綸

官庭草

江聲到枕客心違多病如何未拂衣庭草不妨秋色滿

好留蝴蝶上階飛

陸舟別後值雨重寄

蕭蕭木葉逐江流不是離人已白頭
分手更堪垂老日
亂山寒雨送孤舟

偉長索醉蟹自云老饕發書一笑

小飲終慚客興豪
故鄉昨日寄霜螯
知君舊是江南客
不厭相呼作老饕

寄高柱河夫子

公以侍御視學江南
日閩章國士

敢言薄宦釜生魚官舍蕭條似客居媿比侯芭稱弟子
淚痕空落數行書

晚泊石亭寺

十度扁舟繫石亭龍沙風起客眠醒江洲芳草無情甚
一夜茫茫帶雨青

正月晦日太虛宗伯作詩見憶予適到門遂同伯
璣飲花下

春風騎馬到江城正值繁花照眼明頭白尚書吟正苦

開扉一笑說離情

主人愛客草堂清
高士為鄰詩興生
每到必傾李白酒
何妨長卧灌嬰城

臨江雜詩

閣山烟雨接虛無
碧嶂清江翡翠鋪
好置亭臺添畫舫
為君喚取作西湖

又

更無羅綺艷江邊
高種茶園低種田
一歲繁華燈下盡

滿城歌管送神船

又

萬松郭外一時空
新種桃花幾樹紅
最是春來暗雙眼

江城日夜雨聲中

城南舊有松林
直接瑞筠
山謂之萬松關
今蕩然矣

又

青青橘柚壓江濱
暖日晴烟照眼新
三月花開橫十里
香風吹殺蕩舟人

又

紅柑白笋不論錢
淳樸山川劇可憐
一畝官租三畝穀
農家翻厭說豐年

又

夜夜江頭月一灣
疎鐘聲裏白雲閒
詩僧雪印殘篇盡

隻字從何覓半間

雪印天寧寺僧洪武初召賦金陵春
曉詩稱旨賜衣詩見郡志慧力寺僧

半間有詩
名今盡逸

又

渚鷗沙鷺自雙雙
耆舊風流說此邦
劉孔諸賢俱逝水

至今芳杜繞清江

又

歎乃歌聲日幾回野航無數趁風開大洋洲上迎神去

玉笥山中乞夢來

臨俗吏民速出必先禱大洋洲
蕭公廟又傳玉笥山祈夢靈異

又

回龍寺前野艇橫伏馬橋頭江水清聞說百花春正好

祇餘芳草向春生

郡舊有百花洲今廢

馮木伯罷官永豐別後以官累再至

離筵楊柳春含雨
迴棹芙蓉花滿溪
明日且隨鷗鷺去
滄江莫聽鷓鴣啼

即事

山閣看雲自舉杯
輕風菡萏檻邊開
今年勝事清江少
六月鮆魚出網來

有懷杜蕃舒梅幼與

檻外風帆日日開
江鄉不見故人來
黃柑兩岬看如此
一笑何時共舉杯

為楊中玄前輩題像

力盡謀生家自貧
數間茅屋隱松筠
年過八十惟高枕
笑對青山不媿人

雪中閣望

江城草閣俯漁磯
雪滿千山失翠微
笑指白雲來樹杪
不知却是片帆飛

聞劉孔植推官訃

釜甑生塵苦未休
獨留病骨卧南州
如今客死何人哭

扶觀蕭蕭是白頭

牡丹初放同諸子雨坐

陳元水毛大可田未
若沈治先徐若彞

官亭春盡對花歌幾歲花時客裏過
頭白樽前人欲散
一江風雨為誰多

見阮懷題壁率爾次韻

山城官閣傍松筠檻外花飛覺
莫春雨後忽看江水漲
樽前身是五湖人

即席送大可還蕭山

論詩風雨過三春江畔榴花照眼新明日湘湖歸棹遠
相思各是獨吟人

夏夜

前山雨過月當樓竹影空庭暑乍收湘簟石牀人獨夜
不禁蟋蟀一聲秋

別湖西父老

頃年在官引疾不許及奉裁東去父老夾道焚香泣
送數十里予始泣然不能禁故留詩為別

官拙長懷賦遂初敬亭山下夢吾廬輕舟歸去
君恩重贏得閒身得舊書

二

多慚祖帳徧江洲曉發歸心逐水流怪底萬人紛涕淚
難禁立馬一回頭

三

淚盡憂時白髮侵何勞畏壘卜雲岑它年馮仗清江水

長照平生一片心

子將去時士大夫復構
龍岡書院為俎豆地

書西山丁道人壁

山豆花開野菊秋，隔林茅屋是丹丘。
客來問道惟搖手，隨意清泉遶屋流。

登吳城僧閣

閣正對五老峯

江畔停舟坐不回，精廬小閣向湖開。
匡山五老曾相識，為送閒雲一片來。

草閣即事

草閣時時敞竹扉，石欄平俯釣魚磯。
可憐一樹堤邊柳

能遣飛花滿客衣

題畫冊寄于廬陵慧男

為政風流孰似君
相思遙寄敬亭雲
螺山南畔荒祠在
絃誦年來幾度聞

高峰僧餉茶

雲外山寒吐葉遲
真僧入夏遠相貽
凌風若問峰頭坐
還似人間積雪時

四安旅舍

隔岸青山半夕陽馬蹄歇處是它鄉主人十載重相見
依舊扁舟繫綠楊

晚至碧巖

崩雲亂石相侵臨百丈層崖見竹林古寺峰頭歇清磬
蟬鳴老樹如龍吟

管夫人墨竹

在吳興天聖寺東壁其
西為松雪畫今剝盡

翠篠踈枝帶雨新墨痕傳自管夫人江山南渡留殘壁
此物風流五百春

吳興天寧寺

作客年來萬事慵
朝朝湖上踏青峰
翻嫌詩思如秋水
不寐長聽午夜鐘

重題昭慶寺樓

芳草春風爛漫遊
八年前卧此高樓
如今官拙成衰鬢
何事僧閒亦白頭

憶故園桂

十載離家老桂存
今年有約共芳樽
秋來又作桐江客

細雨繁花空閉門

江山縣弔方虎鄰

方殉難死井中今井上有寒香亭

濯骨寒泉迴絕塵為全黎庶不全身誰知一月江山令
竟作千秋俎豆人

宿晨前

地名在建陽縣武夷道中

野店荆扉旋織成暮烟寒杵若為情客窓更壓山泉急
一夜牀頭風雨聲

武夷山紫陽書院

萬岫深圍舊草堂
釣臺茶竈就滄浪
空山不斷櫂歌曲

鶴唳一聲谿水長

朱子有
櫂歌曲

玉女峰

太華飛來立水濱
崖花開落自為春
若逢毛女還相識
應化山中採藥人

仙釣崖

巖上仙翁白羽衣
渚鷗沙鷺往來飛
釣磯苔滿無人到
歲歲持竿獨不歸

上接筍峰至隱屏絕頂

躡盡危梯俯翠微
松門巖屋坐忘歸
雨從天柱峰頭過
雲向卧龍潭上飛

白雲峰

是武夷九曲盡處

曲盡難窮谿水源
靈峰一折抱雲根
莫言山外即人境
雞犬桃花別一村

鐵笛亭

谿光漠漠樹冥冥
勝事猶傳石上亭
樵唱數聲人靜後

松風吹出片雲青

大王峰頂值鍾道人

虹橋絕處斗壇邊
一綫丹梯萬丈懸
獨住峰頭更何事
白雲長護石牀眠

閩酒口號

客病三山問酒家
持杯閒遠刺桐花
苦心物色蓮鬚白

只說官藍與碧霞

周侍郎閩紀稱曾家蓮鬚
白第一官藍碧霞並酒名

雙投真益

二酒名

不宜人隔歲
陳醪暫入唇
香冽誰能更

柔旨風流聞有洞庭春

宋安定郡王以黃柑釀酒曰洞庭春色聞漳南尚傳此法

再過楓嶺

楓色爭傳楓嶺頭丹霞爛漫破人愁
烟霜此日催寒急葉響泉聲共一秋

還至清湖即目

江郎山下野人家漠漠朝烟出樹斜
烏桕葉殘垂白子參差早擬是梅花

重題釣臺

天削雙峰作釣臺山盤繡嶺白雲開鷓夷千古餘慚恨

日送江潮到此回

錢塘江潮至此即止

翠壁丹亭夕照前晴江落木帶寒烟扁舟定向磯頭泊

七里灘聲十九泉

陸羽品泉以釣臺下為十九

豫章和李太虛宗伯

滿眼山青如翠黛中庭梅落似花鈿詩人共愛東湖好
憑語春風怒酒顛

積寒何處尋鶯語獨客行須傍藥欄主人美酒飲不盡

湖上青春殘未殘

為伯璣悼姬人浣花

秦淮玉樹不勝春窈窕誰當賦洛神已嫁黔婁還早歿
一生荆布送佳人

泊舟得桃花

沙村野店笛聲殘小泊三江渡口寒風雨連朝春暗減
好花留折一枝看

過昭武贈丁景呂廣文

南宮贖已得雋
以兩字被乙

淡憐對策江都好誰識談經賈傳尊夜半把君詩卷讀
滿船風雨一燈昏

送丘慎清赴官鎮遠

重來即別太傷神路過牂柯更問津正是三春花欲暮
可堪萬里獨行人

以麻姑酒遺伯衡

永漲桃花江路紆遊山雖好興愁孤人間何處尋仙洞
分取麻姑酒一壺

哭方爾止

蹉跎萬事總長貧，獨為無兒太損神。
地下莫應逢顧蔡，

吞聲同恨有三人。

顧與治、蔡大美先亡，無子爾止各哭以詩。

老健詩書意獨勤，難將萬卷殉孤墳。
平生哭友惟君痛，誰把新詩更哭君。

宿松隱庵

寒山曲徑石嶙峋，落盡桐花暮雨頻。
惜別重來三十載，松雲匝地苦留人。

江干僧舍見周侍郎題有深竹留人細雨中之句

率爾有懷

淡篁細雨客重過好句留題奈若何欲寄數行相問訊
白蘋風起亂愁多

孫豹人醉吟圖

杜老花溪卜築幽澗堂留滯復邗溝不嫌痛飲踈豪態
眼底吾曹半白頭

尋常不醉市兒酒醉後高歌覺有神雷李凋殘耆舊少

西秦獨霸一詩人

謂雷伯鵬
李叔則

紗帽洲

千帆爭泊帶歸鴉
野店蘆扉盡酒家
汀草江雲應解笑
漫勞相喚作烏紗

豹兒嶺僧舍

回岡合沓畫纔分
半嶺茅庵住白雲
葉落滿林人跡少
一聲清磬萬山聞

寄孤山上人

三年不到雙羊路
夜半鐘聞城外山
時憶休公相對處
亂深松竹片雲間

送人歸西湖

風急空塔紅葉飛
西湖遊子正思歸
湖邊十里荷花滿
何處宜君着釣磯

李陽驛

廿年重上驛邊樓
兩度停舟遇石尤
野店春殘花片盡
白頭浪起白蘋秋

過江浦尋舊蹟或以莊定山先生對

孤城烟火接江關故里爭傳莊定山一疏廷爭成野老
幾篇詩在滿人間

千佛山

在歷城

夢吸南山石窟泉重來亭館拂青天不須更向峰頭望
目盡齊州幾點烟

重題西樵桐陰讀書圖

曾寄三桐書屋歌重看深翠似巖阿山公啟事稱清要

怪底茅齋歸夢多

題沈繹堂撫松圖

層巖樹老卧蒼龍
知在雲間第幾峰
聞道九重新寵顧
只應長對掖門松

謝吳漁山作畫

茅屋谿山古木疎
看來真是老夫居
延陵高士如相訪
綠竹潭邊釣白魚

題阮亭秋林讀書圖

獨吟懷抱向人疎
秋色千山一草廬
好記白雲紅樹裏
雙留老眼讀殘書

過鄴城

按圖記安陽縣有西河是子夏故居

秋清山色太行來
畫錦堂前酒一杯
借問西河人不識
至今漳水說銅臺

夕次蘇門有懷孫徵君

策杖荒臺雲氣重
獨聽泉響倚孤松
夏峰見說高人在
知隔東山第幾峰

嵩山高登崖石室

斧劈青天半壁懸
丹梯老屋舊無椽
山靈憐取孤僧渴
萬石崖中一點泉

許昌孫秀才園乞牡丹

孫松友

洛中花事近全荒
留與鄆陵及許昌
尤物肯分江左去
為君作譜續歐陽

百種名花百尺臺
主人喜客客頻來
籃輿好約花時到
一種花前舉一杯

繩武出佳紙偶書絕句

心清略似龐居士齋禁還迂周太常捲幔北園春樹外
數峰青滿讀書堂

題許子柔歸黃岳圖

歸帆一片入秋烟三百灘聲到耳邊雨後蓮花天半出
不知誰坐碧峰巔

寄姑熟陳蔚宗

江城高館似山村愛客論詩酒一樽好蹋峨嵋亭畔月

與君長嘯倚天門

歙城客寓有古松名曰松屋

烏聊山下好幽居
百尺寒松覆草廬
秋雨松濤聲不絕
虞卿閒著幾篇書

叢菊禁霜解作花
紫陽山畔晚蒸霞
誰將雪竇泉來試

有客新貽茅舍茶

河西有雪竇泉
茅舍產茶最佳

對酒答友人

蓮峰頂上客初迴
岼嶼憤華屏
酒一杯懶向塵中問
閒事

道人元為看山來

獨吟

自分漁樵付此身
苦吟獨笑轉傷神
塵埃莫道知音絕
倘有旗亭度曲人

野興和徐田東金陵見寄

晴江竹樹春可憐
無數繁花開綠烟
野鳥提壺相勸得
阿誰來送酒家錢

年來野興薄
三公散髮長吟松
下風多媿詩朋
勤問訊

青谿好共隱牆東

又疊前韵

黃鳥白鳥聲相憐高枝低枝叢野烟樵子折來渾不惜
城中費盡買花錢

蒼髯長懷白兔公開襟拚對落花風故人相憶不相見
半醉含愁西復東



學餘堂詩集卷四十八

欽定四庫全書

集部

學餘堂

詩集卷
外集卷
二

四十九

詳校官檢討臣劉錫五

助教臣常循覆勘

總校官庶吉士臣何思鈞

校對官檢討臣蕭九成

謄錄監生臣謝滋畹

欽定四庫全書

學餘堂詩集卷四十九

翰林院侍讀施閏章撰

七言絕

示彥恪

莫為吟詩漫損神，苦吟多費百年身。
藏書萬卷應難破，肯許空留與後人。

寄哭偉長

吾宗耆舊數髯翁倚劔長歌痛飲中
草綠孤墳誰酹酒
哀猿落日哭春風

過標紙廟弔張公果

公嘗夢神語以寧郡將漂沒即抱民籍入水死城得不陷

民哀之作標紙廟事見郡志

腸斷東流去不回獨狗河伯萬人哀
江城無恙祠碑沒
誰薦荒墳酒一杯

敬亭閒雲菴側尋虎窺泉

一泓雪乳涌何年虎窟看碑事始傳
箬帽山前開白社

玉蘭花下濯清泉

中秋夜深得好月

酒罷雲開夜未殘
澄江高閣一凭欄
去年此夕蓮峰坐
三十六峰清影寒

金陵寄酬沈康臣舍人

雨花臺畔日銜杯
朔雪南雲首重回
誰料鳳皇池上客
雙魚珍重薊門來

長安折柳髻將絲
脫帽高歌又幾時
謝朓敬亭成寂寞

休文那得一留詩

來詩以未登
敬亭為憾

病懶追歡阻白門青谿時有舊題存當年揚馬風流散

腸斷金臺月夜樽

沈先是久
客白門

巖松徑竹好禁秋人事年華逐水流
老夫長鏡真采藥
青山容我白頭遊

歸舟

葉落風高水樹疎
扁舟雪裏饌江魚
家人問我歸何得
一帙新詩數卷書

唐子菴和壁間絕句

迴岡徑滑青藤雨古寺山寒白晝燈
夜靜好誰池上坐
月明長照定中僧

郝元公自錫山至戲乞惠泉

久負梁谿季子招

謂吳伯成明府

靈泉入夢九峰遙
載來肯療

文園渴差抵龍山飲一瓢

不用梅花瀉玉壺
清泉一勺勝醍醐
憑將綠雪分明試
果壓東谿句水無

聞新安被兵寄吳鷺遠

重嶺差同蜀道難
山城多壘太無端
練江親友烽烟裏
那得平安一字看

劉仲復故居

醉吟泉路興何如
積雨寒山萬木疎
草閣片雲終不散
南陽高士舊藏書

貽上濟南書至得鹽亭見懷及使蜀諸詩

劍閣仙雲接使星
雲谿懷舊淚先零
殘燈雨夜千回讀

蜀客書來歷下亭

二

往日篇章清似水
年來才力重如山
浣花谿畔詩魂在
應為新題一破顏

三

飛棧重關百戰場
錦江巫峽樹蒼蒼
難禁十二峰前望
那待猿啼始斷腸

附貽上鹽亭見懷詩
首嘆晨星雲溪花映泠泠水
獨向鹽亭望敬亭
嵩嶽新詩見典型
舊遊回

方帝卜餉海魚

東遊滄海怪歸遲，海錯將書一解頤。
却憶金盤曾飽啖，蓬萊閣上看潮時。

余生生還吳門客，舍自言為梅花作主人。
酒間得三絕

市上何人識故侯，青鞋皂帽稱心遊。
相逢頭白留詩別，細雨孤帆下虎丘。

遙歸見說為梅花，鄧尉風光滿眼誇。
我夢相隨便東去。

一天花壓帽簷斜

花時歸客怕花殘
烽火漫漫道路難
斷送春風多少恨
憑誰留寄一枝看

題畫松寄徐善長翰林

迴枝拂地鬱千盤
彷彿慈仁寺裏看
倚樹獨吟何處客
半空風雨碧山寒

花前荅客

乙卯春家園牡丹盛開日日觴客
客謝曰花累主人矣笑而荅之

年年觴客為花忙
袞袞連朝復共觴
回想亂離今好在

黃金費盡儘相當

每出看花到夕暉
作花都護怯花飛
闌前倚醉深深酌
陌上行歌緩緩歸

西樂菴看牡丹題壁

蘭若深穿藥檻邊
好花開過落花天
遠公結社餘清興
明歲鑿池看白蓮

自春歸臺臨眺至城南看竝蒂牡丹

高下人家住翠微
青青草色上人衣
春歸臺畔春光在

造次何煩柳絮飛

山家野寺看花回
深巷花驚竝蒂開
側疊春風開不盡
好誰徐把合歡杯

漆樹歎

斫取凝脂似淚珠
青柯纔好葉先枯
一生膏血供人盡
滑滴還留自潤無

發牛渚

萬樹松聲五月秋
三山磯畔幾回愁
長江解念孤舟客

肯送南風下石頭

初值黃仙裳

白門相見鬢俱霜此夕悲歌共此觴記得故人腸斷語

每因詩卷說仙裳

顧與治詩多散逸數言仙裳處有抄本

不共狂歌狎海鷗茫茫滿眼歎橫流尊前又是傷離處
明日長江送客舟

同蛟門夜讀王西樵年譜

風流歷歷見平生文酒招尋憶帝城同是瑯琊舊游好

白門相對淚雙傾

二陸才名更數誰雁行中斷不勝悲燈前病客餘慚恨

舊約猶逋有道碑

阮亭以西樵年譜
屬為墓表故云

江浦城西十里有泉出亭下問之無名戲得口號
孤亭留客亂山邊下有泉流清可憐地近竹蘭人不識
祇應喚汝竹蘭泉

秋林讀易圖成自贈

長吟多病愛崖扉五十平頭早息機努力韋編真悔晚

不知林外亂雲飛

題蔡鉉升近詩

蔡絳年世曾有秦淮
春望諸詩頗極感寓

殘柳依然繫畫船
六朝舊恨夕陽邊
傷心莫謂須頭白
痛哭長沙本少年

題春山雪霽圖有感

千尋飛瀑下雲端
江色遙憐樹影寒
好處家山渾在眼
會須歸去倚樓看

題畫

老懶何心汎五湖
山根時繫釣船孤
白雲忽向前溪過
屋角青山半有無

周雪客戴笠圖

兩世風流洛下聞
軒軒意氣直干雲
青松碧磧吾儕事
笠子如何肯讓君

西山即事

山上桃園山下田
花時雨後瀉紅泉
田家近日生涯改
半割平岡學種烟

汪鈍菴戶部杜門山居見貽二詩兼索敬亭綠雪
十載離居白髮新偶來不及虎丘春堯峰書到添惆悵
何處空山覓此人

正是長松散髮天自携茶就惠山泉囊餘一片龍團在
石鼎應煩桑苧煎

虎丘偶題

虎丘茶試蓑衣餅雀舫人爭餽鈍菱欲待秋風問鱸膾
五湖烟月弄漁罾

埋劍空餘霸氣存
綺羅絲管四時喧
傷心偏問真娘墓
不酌吳王酒一尊

題怪石圖

米老驚呼入袖難
嶙峋尺幅迴生寒
丈夫磊塊胸中足
五嶽擎來掌上看

塔影園尋顧云美不值

大好池亭傍草堂
依稀塔影在中央
扁舟相就不相見
蓮葉風多吹客裳

袁重其負母看花圖

負米辛勤淚滿襟
娛親孺慕老尤深
祇今五月花開日
猶見三春寸草心

七十二峰閣

湖面憑闌六月寒
衆山如鷺水漫漫
何當縹緲峰頭坐
盡攬芙蓉杖底看

蔡右宣汪覲臣諸子追送至虎丘毛大可張南士
董無休即席有詩贈別

華燈綺席玉為缸宿鷺眠鷗他自雙忽聽驪歌聲未斷
一時秋思滿吳江

滿坐詞人酒滿卮虎丘執手問前期河橋誰見銷魂處
夜半月斜山寺時

舟中寄謝吳無錫

吳隱家風官自貧苦心為客不謀身却慚安邑殷勤甚
仲叔當年恐笑人

嘉樹堂前折柳枝二泉亭畔倒金卮峴山叔子風流在

猶讓當筵對客詩

金陵買屋事仍艱作客還山總未閒
長憶延川眷僑肱
草堂好置九峰間

把臂相看好入林殘樽向夕恨分襟
舟回百甕清泉在

照見延陵一寸心

時餉子
惠山泉

書毘陵龍興寺壁

唐荆川羅念菴兩
先生曾講學於此

龍沙精舍水雲隈長夏松陰晝不開
傳說兩賢留講席
百年惆悵一人來

晤姜子翥

十年湖海問元龍
一夕同聽水寺鐘
莫恨來朝即離別
爭如白首不相逢

公湛言處士方嘉徵義甚高率題奉簡

湖陰見說有方干
數就姑山問講壇
耆舊只今搖落盡
何年執手一相看

梅八丈貽詩索綠雪一笑荅之

清冷漫擬雪為漿
倚客題詩占一方
消渴年來同病在

松風石鼎好親嘗

吳孟舉新買名園曰黃葉村莊作種菜詩索和戲

東

葉滿村莊酒滿尊便便腹筍舌難捫紫螯黃雀饒鄉味
肯把黃齏嚼幾根

嘗新小摘一開尊徑滑垂藤尚可捫飽噉無人爭坐位
石邊閒却老松根

夢題敬亭山亭子覺來僅憶得起句為續成之

敬亭山半好山亭幾曲丹梯上杳冥野客閒雲相伴住
舉頭天際一峰青

額珠樓

樓踞敬亭高處舊
令陳侯剛長所構

雲中飛閣太崢嶸鑿破青天意未平憑仗山靈留好在
風流長說舊宣城

兩水孤城掌上分憑闌帝座語堪聞何人呼得青蓮出
一片寒山空白雲

題王生望雲圖

幾人真廢蓼莪篇畫卷携來一惘然我有平生無限淚
掉頭愁向白雲邊

飲鄭扶九宅

碧雲紅樹傍堦生谷口山堂繫舊情二十年前花下酒
白頭相見又同傾

度新嶺口號

半天虛白度嶙峋巖穴僧閒起未曾昨夜人間聞細雨
山頭積雪已成冰

宿將軍廟有懷隱龍方氏諸舊游

夜抵梅谿路不分故人咫尺悵離羣
欲知相憶成何許十里青山萬疊雲

題大安寺舊寓僧舍

廿年前宿贊公房半壁題殘字幾行
底事重來迷處所含情物色舊繩牀

小喬墓

白雉臺東古寺前小喬墓在土人傳
春心不死餘楊柳

舞盡春風起暮烟

池陽至皖口漫興絕句

寒蘆帶水作冰花
木落空江一雁斜
南發青溪浪如屋
可知地近長風沙

秋浦誰聞猿夜愁
錦袍仙客舊淹留
清溪解惜狂歌處
縱近長江不肯流

誰遣樓船下石頭
幾番烽火照江流
興亡來去如潮汐
恨殺無情是白鷗

舟人誰辨皖公山
巉削遙看暮靄間
好買鯉魚送斗酒
一鈎新月到江灣

書石埭姚六康明府紙尾

孤帆一宿清谿口
客夢頻飛黃鶴池
憑寄魚書亂心曲
千行書不盡相思

真拚老嬾愛離羣
風義何人復似君
兩處陵陽山不遠

川塗偏恨皖江分

宣城石埭各有陵陽山

即事漫興

宛陵春漲抱城流，無數桃花笑獨愁。誰送香醪如竹葉，

烹鮮小酌試蒿頭。

小魚可二寸極肥，美俗稱蒿頭。

書雉城張羽士壁

曲闌小几自茅亭，坐對藤蘿覆壁青。除却看山無箇事，
茶烹廟芥讀黃庭。

梅雨翻盆暑閣涼，桃笙睡美接羲皇。若溪一夜添新漲，
為問扁舟傍故鄉。

蔣蒼舒出佳紙為書二絕

蔣畫人物

園開三徑舊爭傳
跋扈論才正壯年
底事丹青憑遣興
草堂元向畫溪邊

聞道龍眠貌大蘇
眼前人物似君無
看予斑髻慚能手
好畫柴桑漉酒圖

合溪值雨宿僧舍

萬壑飛泉此合流
繫舟一夜雨聲秋
前生莫是僧樓客
贏得孤眠最上頭

洞峇以朱氏擅名吳下謂之朱茶

官符少得金泉水地主難求廟後茶製作丁姚皆好手

風流底事獨朱家

金沙泉距縣三十里隸人多取城外紫金橋下水代之又廟後茶園為丁

姚二姓
舊業

隱龍山中曉望得句

龍山曲曲留山客昨夜龍吟山石裂西峰雨過雲不飛
木末秋看半天雪

青風嶺弔王貞婦

青松半嶺石巉坼古廟舟人指點看欲弔懸崖題字處

布帆吹斷北風寒

台郡遇汪翁者吾鄉涇人也贈一絕句

一官留滯竟浮家海國烟霜兩鬢華
夢到桃花潭上水可能長愛赤城霞

謝公嶺

相傳康樂入山處
舊有落屐亭

礧由斤竹舊題詩過嶺停傳蠟屐時
誰道謝公身未到天留雁蕩少人知

宿羅漢寺

武夷山中
近大龍湫

重林暮色隱巖扉
客到鐘聲出翠微
不識龍湫何處所
坐中飛雨濕人衣

別傅傑先文學

多君風義眼中稀
飽共看山到海歸
日暮甌江分客路
不知何事一沾衣

誓節渡悼逆旅主人王翁

始翁餉予粟問故曰
記十年前公飯此
見案頭有餘粒
手取食之知公盛德人也
予笑曰翁乃記予細事

頃予自澗回而翁已死其子言翁嘗念我天寒未歸
蓋數日前語云

歎息蒼頭舊主人無端留眼太情親
重來繫馬不相見
昨日猶傳念我頻

武陵峇戴岵瞻同門送別口號

倦游終歲半離家坐語尊前日又斜
謝李才名成底事
相看青鬢各霜華

題畫

蒼崖壁立雨初收
松際泉飛匹練秋
老眼青山看不足
杖藜何日到峰頭

荅吳松子書附一絕

素書消息動經年
又折梅花倩客傳
憑語春江過笠澤
詩瓢好付阿誰邊

姑江口號

滿天飛雪片帆來
載得春風幾許迴
莫向青山問冷暖
梅花江上一時開

涼繖橋戲題

飛蓋何人谷口行
山梁片石借為名
題橋錯把相如笑
此物從來屬世情

春雨至夏不已

橫塘流水漫東西
卧擁殘書懶杖藜
不住雨聲春早去
教人何處覓鶯啼

亡友梅杓司嘗浮家白門生子南為今善畫作詩
與之

響山宿草痛多時玉樹亭亭又一枝年少丹青看爛漫

風流何減阿翁詩

杓司舊家響山

青箱零落倦論文老蚌生珠自出羣莫是故鄉情太劇
扇頭長畫敬亭雲

朗三詩畫舊聲名二妙瞿山又雪坪添汝不妨成後勁

梅花樹樹照江城

王弇州有不及梅家樹樹花之句

到來斗酒共招携生長秦淮家宛谿舊業荒蕪歸好住
雙羊南畔釣臺西

偶寓秦淮即事

碧水如何不種蓮，曲闌涼近白鷗天。
故人知我吟還渴。

雲液分來第二泉。

金使君見遺
惠泉四甕

秦淮清淺暗通潮，夜市疎燈見畫橋。
水榭風多眠復醒，隔溪深柳聽吹簫。

題彭爰琴抱膝圖

疎桐幾樹碧雲重，除却詩篇萬事慵。
欲識高歌小天下。

千言飛落丈人峰。

君登岱宗長
篇凡數千言

卧龍應復是前身長嘯重看抱膝人同被徵書君獨卧
倘容江漢共垂綸

學餘堂詩集卷四十九

欽定四庫全書

學餘堂詩集卷五十

翰林院侍讀施閏章撰

七言絕

北征口號

筐筥縱橫黍麥陳
喧闐物色片時新
君看江北行千里
野市初逢趣集人

又

茅店從無酒一杯
炎風刮面總黃埃
連檣正送兵船過

動地還看御馬來

時發數千騎征南謂之御馬

又

平原彌望絕孤村
疊奏開荒慰

至尊猶剩蕪田
千萬頃好誰報墾荷殊恩

又

歌風臺近起悲風
劉項雌雄茂草中
駐馬日斜餐豆粥

幾家殘店說新豐

又

腰弓箠矢騎如雲
膽落行人傍夕曛
見說年來鳴鏑少
健兒強半去從軍

又

河決年荒處處愁
買魚沽酒問徐州
題詩白傅多情甚
留得春風燕子樓

又

黃河北去好山稀
路傍龜息見翠微
最是峰峰經雨後

芙蓉洗出白雲飛

又

明湖畫舫濯塵纓
依舊荷花照水清
正值鹿鳴秋薦近
白頭重接魯諸生

又

日夜蟲聲不肯休
干戈衰疾并含愁
老夫宦興秋雲薄
不分飛蓬愛遠遊

又

夏歌雲漢又秋霖路改高原攬轡尋斜日暗飛高樹下
暮蟬衝過馬頭吟

又

積雨嚴飈帶雪珠誰知七月粟生膚故園橘柚霜還未
此夜江南寒到無

時七月廿七日
景州飛霞

又

虎符羽檄騎如龍萬里軍儲五載供安得長蛇齊掃穴
晋天高枕罷邊烽

憶舍弟阮

我行汝病淚雙流腸斷高堂更白頭今日平安誰問取
南憑一雁為銜愁

和姬人珠淵寄小鏡

白頭相許伴青山天意驅人不放閒寄到菱花將錦字
斷腸獨自照離顏

附姬人詩 六月扁舟別故山勞勞旅况幾
時閒傷心不似匣中鏡千里依依伴客顏

為陳子萬題

家世元龍氣未除
絃歌小試興蕭疎
十腰銀艾渾閒事
一箇蒲團半卷書

寄哭吳自明

別君分手憶河梁
幾日俄驚老友亡
萬種夜臺腸斷處

慈親八十未稱觴

君歿時距母太君
八十初度僅兩月

書法從來號絕倫
文章磨切苦相親
劉郎歿後謂潤伯延

州去同學凋殘復幾人

詩篇海岱記相於
索我重書約尚逋

君嘗命重書山
左奉贈詩未報他

日隴頭雖挂劍不知能到冢中無

東溪溪畔玉山頭百遍相過把臂遊從此溪山雙淚眼
月明無伴水空流

戲東對巖索空餅貯藥酒

把醞看花眼自青新成菊酒製顏齡白衣敢望重來送
莫惜龍山雙玉餅

戲和阮懷悲髮白

兩人同病漫須悲耐老相看到鬢絲纔被徵書幾零落

可知應美白頭時

時被
召百餘
人
歿者已四人

移寓即事四首

新移客却面朝陽容膝攤書即草堂
向夕疎簾從半捲
好教明月到匡牀

書聲不敵市聲喧恨少蓬蒿且閉門
此地棲遲曾宋玉

蘚牆零落舊題痕

宋牧仲
舊寓處

葡萄霜際葉蕭森物色兼催遲暮心
好處爭誇在三伏

桃笙烏几綠陰深

年侵出處自嫌身望遠問關人夢頻嶺樹江雲秋未冷
鷓鴣聲裏獨吟人

題嚴存菴學士小像

新詩一卷盡驚人奪錦宮袍早致身挾瑟妖姬書滿屋
可容重占五湖春

塵中何許得開顏鹿柴花林好是閒誰解客星成大隱
芙蓉闕下見青山

燈夕同諸公月下口號

令節良宵草草過天街燈少看人多論文結伴渾無賴
占盡風流踏月歌

聯臂誰聽玉漏催前門紅袖摸釘回太平鼓靜鼇山暗
錦勒香車不斷來

燈市常年靈佑宮今年燈市散春風

聖朝罷却天魔舞烽火休教照夜紅

秧歌椎擊惹閒愁亂簇兒童戲未休見說尋常歌舞競

大頭和尚滿街遊

郁下兒童競唱秧歌擊椎
相應又拈大頭和尚為戲

繁華勝事恨難論一朶華燈五百緡不是祝融先奪取

黃金買去向誰門

先夕一燈被火嘗索價五百緡

為朱守亭題秋山獨坐圖

射陽湖畔多才子况復超宗有鳳毛見說文辭滿京洛
臯比坐擁且揮毫

箕踞深林復幾人秋山紅樹倍還春東風又到不歸去
夢裏滄江生白蘋

山中喜遇朱錫鬯嚴蓀友姜西溟秦留仙諸游好

花林深翠月初明無限春山獨夜情
聯騎相逢成一笑
西峰絕壁共題名

礪底花

山行鷓鴣欲鳴時礪塢餘花少
客知草是怕春歸去早
殷勤留蕊獨開遲

潭柘歸途重經戒壇山下得口號

騁興峰頭復水隈雲深路轉騎重回
山家兒女相看笑
昨日尋山客又來

同耦長有懷蔡九霞葉九來陳其年諸子

卧龍岡外挂斜曛
谷口花飛細路分
遙憶渾河東畔客
湖臨裂帛萬條雲

和葉九來憶鶴

羈棲莫遣報春殘
無那鄉心到藥欄
遙愧故山林下鶴
相思清夜數聲寒

駱令君小照

名襄雷號雷卷別號龍媒浙鹽官人丁未進士江都令

抱膝科頭豈世情
蕪城賦就舊知名
憑君留得心如水

應照邗江徹底清

陂陀芳草綠侵衣
坐看晴雲拂面飛
夢在青山身赤紱
不妨廳事當漁磯

宗定九屬題李叔則畫

垂垂老樹傍江干
數點疎花照水寒
似怪春風不相識
幾人留眼雪中看

王侍讀以詩索耦長畫扇兼屬和

有只寫澄江
與北樓之句

鄉心嘗夢舊溪游
朔雁南飛又早秋
縱寫敬亭團扇上

何如高卧謝公樓

走筆促嚴蓀友檢討作畫

秃筆滄洲興杳冥涼風客館又泠泠
惟君最共看山癖寫出龍山幾點青

尚署梁溪老布衣塵中冠蓋似君稀
迂疎且作倪高士不為丹青論是非

題楓江漁父圖為徐電發檢討

秋雲漠漠水漫漫一色芙蓉十里寬
不向長安飢索米

那知回首羨魚竿

才調東吳數菊莊
騷歌漁父興偏長
孤舟訝許疎狂甚
家在虹亭鱸膾鄉

邵子湘重過言別因宿寓齋得二絕

臨發停車復幾回
後期懷抱好誰開
連朝陰雨重陽過
恨失青山黃菊杯

策騎明朝海畔行
重來襆被話離情
懸知此去三山近
少我三人共月明

尤悔菴檢討以家在江南楊柳村作二蠲句屬耦
長畫率爾用韻綴卷後

家在江南楊柳村
芰荷匝水復蘿軒
白頭共是羈棲客
怕聽尊前說故園

家在江南楊柳村
霜林滿眼動歸魂
扁舟繫處茆堂近
笑指臨磯舊竹門

和張荀仲先生枉哭家叔父四首

嗚咽親書墮淚辭
淚痕直徹九泉知
回思在日難分手

百遍躊躇別去遲

傷心不忍復登樓
舊日殘詩壁上留
扶病白頭拚慟絕
敬亭雲樹一時秋

何限交情共素襟
死生辛苦范張心
似聞欸欸遺音在
重向樓前月下尋

生憎鑑水隔江南
老去離屈總不甘
千里龍鍾還挂劍
延陵義重幾人慚

再題王山長小像

坐客無糧未厭貧
紉蘭佩葢楚靈均
捫胸五岳難平却
閒弄焦桐不語人

詞賦丹青總緒餘
便便二酉腹中書
平津賓客今時盛
不信難容一仲舒

見彭羨門同年懷舊居三絕率爾次韻

藥裏經心髻早華
隨人蹀躞御溝涯
塵中何處尋春色
昨夢山堂幾樹花

三春不雨百花愁
韋曲藍田滿眼秋
此日江城芳樹裏

敬亭深翠滿樓頭

松屋雲多觸手披
花溪捲幔讀書時
一官垂老不歸去
送盡春光却恨誰

偶同王侍讀弘衍菴看海棠即次王韻

頻年春事屬誰家
送客青門日又斜
爛漫相逢禁不得
憑闌深坐半樓花

把酒聽鶯計已遲
花宮錦樹自垂垂
飽看三十年前事
猶記韋公寺裏時

老年不許重關情，遮莫韶光過帝城。
何事東風太無賴，幾人春恨此中生。

干戈休憶蜀川紅，攜手猶憐一笑同。
腸斷山園餘老樹，叢枝冷亞石闌東。

荅梅子翔淵公見懷用王阮亭侍讀韻

東山詩伴久寥寥，愁思春江帶雨潮。
忽報梅花來驛使，南飛客夢落雙橋。

絕唱連篇又手成，懷人長嘯氣縱橫。
東風為爾吹惆悵。

重引鄉心滿薊城

論文坐對北山時
草閣平臨宛水湄
自笑生涯詩卷在
邇來累月少新詩

柏枧東溪無限春
山花相勸酒千巡
舊時猿鶴應嘲我
近許何人更結鄰

寄題王漢侯暢心閣

檻水蘭橈憶舊遊
龍湫天姥傍層樓
主人愛客餘豪興
誰共開襟在上頭

朝飛雲霧暮飛霞
浦榭山齋次第花
正是永和觴詠處
蘭亭終古屬君家

題宋牧仲雙江唱和集

坡公游處路重經
訝許詩人共客亭
留得官橋長好在

使星曾伴少微星

君嘗于使院池上構小橋以待魏和公

荔子桑花勸客杯
匡雲東送片帆回
鬱孤臺畔休回首
早捲雙江雪浪來

王阮亭宋牧仲謝方山諸公偶集寓齋適高侍郎

念東先生至即席見贈口號漫和紀興

陋巷何當駐兩駟却憐嵇阮共清談先生自帶一壺酒

不待傾杯已半酣

公嗜苦酒故自取家釀一壺

盤中惟有露葵羹慚被高賢說大烹衝口詩成杯在手
清歡那復問侯鯖

奉詔高念東侍郎餉新橋用韻

洞庭嘉實碧雲籠入手香生滿院風安得容身如盎大
此中長作對碁翁

攜來十月正烟霜料理呼朋伴蟹嘗縱使酸寒吾意足
故鄉一物九迴腸

得姬人珠淵寄詩憐而和之

少難離別老何堪錦字傳來淚一函莫為天寒愁北客
夢中夜夜在江南

附珠淵詩 雨滴梧桐秋不堪憶君誰共接
清談老天如識妾心苦北地風霜盡入南

同館汪鈍翁編修假歸

悠悠相聚別相憐不淺論文二十年頭白何時重執手

忽驚雙淚落君前

閉門高枕謝公卿
史筆紛綸數卷成
特報

主恩臣力竭江皋
天放踏歌行

金門興嬾夢雲沙
襖被風輕二月槎
妒殺長年相約定
到時猶及牡丹花

堯峰別自五湖東
竹徑茅堂畫舫通
雲壑逢迎猿鶴喜
少微星果照吳中

送高少司寇念東先生歸淄川

朝辭闕下暮山隈
襪被行歌酒一杯
莫道先生歸去晚
十年前已乞身來

東山再起志多違
纔應徵書又拂衣
喜脫朝簪官好在
白頭猶荷主恩歸

晨趨闔闔每愁遲
叉手官曹自詠詩
此後閒吟高枕得
山青雲白捲簾時

中書廿四考何如
把卷松根爛醉餘
仙佛高談長在口
那知戴笠與乘車

齋厨滋味止齏鹽此日歸裝轉不廉虎穴鳳毛來萬里

無官有子一時兼

公冢君官黔中阻亂九年矣至是適歸

星軺見說登衡岳芒屨重看過岱宗海畔羣山青滿眼

杖藜咲指兩三峰

溜水盈盈傍錦湖春來桃李覆菰蒲花前野酌容誰伴
覓得香山九老無

詩篇別是高常侍懷抱應同陶隱居來歲春風剛七十
歸田餘興著何書

附元唱詞人大雅是吾師莫笑金門曼倩飢我較
昔賢歸較好青門無此送行詩吟壇韓孟策奇勳
刻燭題詩曉漏聞它日相思何處好泰山雲接敬亭
雲講堂聾噴一時新白鷺青原泗水濱四百年來
吾道在魯齋
今現再來身

送蔣波澄

西陵詞客共招邀三徑無端歸夢遙倘憶黃金臺畔路
濯纓應愛浙江潮

十年音驛斷金沙學士門前有暮鴉謂虎臣在日憐君君

念舊懸知問訊一停槎

哭茅一峰

哭君淚盡不勝情，往事淒涼過半生。
纔入金門又泉路，天風都作斷腸聲。

蕭蕭歸櫂冷斜陽，藥裏詩留字幾行。
最是哀榮獨絕處，

一時館閣盡沾裳。

時朝列諸鉅公同
年贈賻者百餘人

臚唱聯翩競一時，霜風先折好花枝。
歸魂倘認家鄉好，多在潺湲宛水湄。

放榜後知湯潛菴王蓼航宋牧仲三君之子並見

遺悵然志憾

長就珊瑚鐵網遺
詎迷五色數偏奇
它年騰達非難事
腸斷知交欲淚垂

口號索黃祥符河魴

縮項槎頭風味長
詩人雅詠美河魴
黃花勸酒思魚鱠
好問漁翁索一嘗

到家題壁

漫誇金馬玉堂身
依舊相如四壁貧
垂老承

恩真忝竊誰留鴻筆照千春

三年竊祿滯燕關
袞袞長思林壑間
昨日南歸今北發
含情一望敬亭山

戲示徐姬

姬人徐氏珠淵小字善懷江都人也初畧識字不欲
令作詩間竊誦余作亦能為五七言句子善病嘗累
月宿別館相值如客都無怨色生一女殤不復乳余
憫而遣之輒以死誓藥餌飲饌必手治以進事余廿

餘年矣予應召改官南人卧不習炕衰體不温既而
老妻遣送來侍固止之不得曰聊以煖老於是暑則
异榻寒則同衾牀第之間邈若千里而柔謹有加曰
君好自愛妾得為侍書女史足矣性厭葷血强半清
齋家居或薄飲數杯既來京却食貧間三五夕不沾
酒茗飲歡然予不為太常之齋禁難遣白傅之楊枝
未盡忘情笑示二詩

敢言天女伴維摩忍背春風奈若何倘似朝霞隨玉局

頻年活計藥爐多

偷鈔詩句上羅巾
甘擲紅顏逐老身
猶勝經年一相見

隔河牛女可憐人

附徐姬春日望北信作
九十年春歸感歎生黃梅時
節乍陰晴香閨有淚無人見
且倚闌干聽烏聲
庶祖母徐孺人生而端莊淑慎
事先大父始終一循
乎禮其侍疾刲股一節尤堪感泣
先大父纂修明史
積勞四載遂至成疾於癸亥三月
疾大作孺人時從
侍卸舍飲食藥裹手為調奉每夜
必潛自熬香鬪天
願以身代如是者匝月疾愈殆
孺人自念曰豈天故
不鑒予抑予誠未至也廳中故有
關帝神像靈赫
素若孺人於夜分時戒小婢持燭
至神前默祝哀禱
者久之出利刃割左股寸許小婢
在旁驚視惟見神

厨内諸像森森欲動簷楹及牆角四週亦若有人林立俯視家人外舍廵宿者遙睇悉如是孺人昏仆於地恍聞神語曰汝之誠虔已至但數不可易吾當為汝假百日期可耳勿過自苦孺人乃嗚咽驚寤退舍以所割和羹進而人固弗知也是為四月初三夜自是先大父疾漸瘳且強飭如平日人皆為之稱慶孺人顧隱憂不釋恐神語或驗也閏六月之十三先大父忽以微疾棄世逆計其期適百日耳嗚呼痛哉異哉始家人弗覺嗣小婢亦稍稍語人或詢之孺人孺人惟漫以應之嫌自張也璞幼孤蒙孺人思育凡朝夕居處悉隨孺人一日從外塾聞客頌茲事歸遂詳叩所以且固請之孺人悲不語良久乃摩璞頂泣然流涕曰汝孺子奈何必欲知此顧吾不忍汝諱也爰屏左右詳認如前且出示左股創痕宛然復持璞大慟迄今追憶之其情事猶歷歷在目真為淒絕一時也天不我佑孺人於歲丁卯方稱四十觴遽棄璞長

逝嗚呼痛哉孺人於先大父事之竭誠盡禮而琛于
孺人無毫髮報稱抱恨寧有涯乎孺人故精文墨吟
咏甚多原稿琛皆謹藏篋衍編次成帙行乞當代大
賢弘筆序以授梓今集中附載者不過吉光片羽耳
不肖孫琛
收淚謹識

傾蓋亭

行經河甸復江津望古長思共語人多少高車空接軫
昔人傾蓋已千春

舊蹟茫茫古道隅交歡脫贈道難孤如何永日高談處
傳記當年片語無

題趙水星西湖小照

湖堤風柳夏泠泠誰卧滄洲是客星
斗酒載將雙屐去
蘭舟恰對兩峰青

憑陵曾踏丈人峰攜興閒聽天竺鐘
竹塢松亭烟雨外
不知若箇得相逢

張荀仲前輩書來末附二絕句率爾奉荅

越水燕山萬疊雲十年華髮恨離羣
長安書札堆盈案
一紙魂銷獨為君

夢中曾共坐招提老去何能手重攜兩地相思無斷絕
三生舊路未應迷

題徐大中丞小照

隱囊烏几坐題詩軾轍郊祁又一時廿四中書書上考
何如天壤大名垂

對客風流四坐春批鱗憂國不謀身誰知抗疏回天手
依舊焚香把卷人

直筆沉埋董史餘龍門去後復何如多公伯仲稱能事

寸管重緇七畧書

監修明史令伯兄
先生人為總裁

社稷臣如汲黯難風儀麟鳳立雲端安危久繫中朝望

圖畫應傳四裔看

史稱契丹使至望見文彥博立于朝
門却立改容曰此潞公邪真天神也

漫題茅于純冊

烏程堪作醉鄉侯底事長安汗漫游歸去擁書高枕得

花溪舊有白華樓

客游終勝宦游閒別後重開冰雪顏留得文章嗣家學

好傳姓字滿人間

為韓醉白題修禊圖

千載何人復右軍
蘭亭曲水恨空聞
祇疑修禊當年客
尚有遺民恰是君

病中答博問亭

長眠一月竟沉淪
腸斷親交問省頻
欲報主恩心未死
九原今有再生人

病中憶卜葬處口占

生前叔父細商量
山似梅花谷可藏
但得幽魂相接近

年年麥飢野花香

學餘堂詩集卷五十